



# Gutpela Wasman

No 3/2018

**Jisas Krai i tok,  
“Mi gutpela wasman  
bilong sipsip.”**

Jon 10.11

## Lukautim liklik mani, wok na pasin bilong yu Mani i gutpela olsem wanem?

Wanpela lapun mama em yet i save i stap long kantri Niu Yok. Em i gat planti mani tru, tasol em i haitim olgeta mani bilong en gut tru. Em i no save givim mani bilong en long helpim ol arapela manmeri na tu em yet i no save yusim ol dispela mani.

Wanpela de dispela lapun mama i dai long wanem em i no save baim gutpela kaikai bilong em yet. Ol lain i stap klostu long em ol i helpim em na baim kofin bokis na planim bodi bilong en. Ol i ting olsem dispela mama i wanpela trangu mama i nogat wanpela samting.

Ol polis i go insait long haus bilong mama na ol i lukim bikpela bokis na drowa i stap. Taim ol i opim, ol i lukim planti mani i pulap i stap na sampela benk pepa tu i stap. Na ol arapela bokis tu i pulap long mani na stap. Ol planti

bokis mani i helpim mama olsem wanem? Mama i gat planti mani na taim em i dai ol famili i kisim dispela olgeta mani.

Baibel i tokim yumi olsem, taim mama i karim yumi, yumi no kisim wanpela samting i kam. Na taim yumi dai o Jisas i kam bek, yumi no inap kisim wanpela samting i go wantaim (1Timoti 6.7). Mani na ol arapela samting God i givim yumi long yusim. Taim yumi stap sotpela taim long dispela graun, yumi mas yusim ol dispela samting long gutpela rot. Sapos God i givim yumi planti samting, orait em i laik yumi helpim ol arapela tu.



Yumi nogat samting o yumi gat samting, oltaim yumi mas amamas long wanem yumi gat Jisas insait long laip bilong yumi em bikpela samting na em inap long yumi.

## Liklik i gutpela moa long planti

Wanpela rat i save stap long ples we em i hat tru long painim kaikai.

Tasol long dispela hap i nogat rat trep olsem na em i save stap gut tru.



Wanpela de dispela ples rat i go long haus bilong kandre bilong en long siti. Taim em i go stap wantaim kandre rat long siti, kandre bilong en i soim olgeta kaikai i stap insait long haus bilong en. Olsem bata, sosis na arapela kaikai rat i save laik long kaikai.

Ples rat i tok, “Mi laik stap olsem siti rat na kaikai ol gutpela kaikai.” Wantu tasol wanpela pusi i go insait long rum. Siti rat i lukim na tokim ples rat olsem, “Yu hariap na ran go insait long hul i stap long kona.” Tupela wantaim i tingim laip bilong tupela na ran. Tasol siti rat i ran i go insait stret long trep na em i hangamap na i dai. Ples rat i go insait long hul na em i pulim bikipela win tru. Bihain em i lusim olgeta gutpela kaikai bilong siti na go bek long ples bilong en. Rat i gat planti samting em i dai na rat i nogat planti samting em i stap laip.

Sampela taim ol Kristen tu i save jeles long ol arapela i gat planti samting tasol dispela em i no gutpela pasin. Baibel i tok i gutpela moa yumi gat liklik samting tasol na stap laip wantaim God. Dispela i winim tru ol man

i gat planti mani kago samting na i givim planti hevi long ol.

Jisas i bin givim tok lukaut long ol man i laik kamap man i gat planti samting. Husat ol man i save laikim tumas mani na planti samting ol i save lusim tingting long God. Em isi tru long ol i save givim baksait long God na lusim laip bilong ol yet. Aposel Pol i tok long ol man i laik i gat planti samting ol i save pundaun isi long trep bilong sin. Na planti samting ol i save laikim tru long kisim i save givim bikipela pen long ol bihain. Bikipela hevi moa bai kamap sapos wanpela man i lusim nupela laip Jisas i givim em.

Gut moa yumi gat liklik samting tasol wantaim Jisas em inap na i winim tru man i gat planti samting na nogat Jisas long laip bilong em.



## Lukautim wok na pasin bilong yu

Dia ol pren, mi laik stori long ol bi. Planti taim yumi save lukim ol dispela ol hanibi i save bung na flai raun. Ol i save mekim bikpela nois tru taim ol i raun. Taim bilong bungim o planim kaikai, ol dispela hanibi i save raun long olgeta hap. Sampela i save go raun long naispela plaua na sampela i save go raun long liklik haus (toilet) na bringim ol samting i smel na nogut tru. Ol i save bisi tru na i no save malolo. Bosman bilong bi (kingbi o kwinbi) i save stap long liklik haus bilong em o long wanpela gutpela hul bilong diwai.

Taim bosman o bosmeri i traim na lukim olsem ol samting ol bi i kisim kam i gutpela ol bi i save amamas. Tasol taim em i traim na i no gutpela, em i save givim oda long dispela bi i mas i dai. Bosman i no save marimari long ol. Nogat. Ol i save dai tasol.

Dia ol pikinini, yumi no inap hait long pes bilong God. Nogat tru. God i marimari na wok long givim taim yet na yumi mekim ol gutpela pasin na pasin nogut wantaim i stap. Yumi go Sandeskul na kam bek na mekim ol arapela pasin we i no stret long ai bilong



God. God i lukim pinis ol pasin yumi mekim, em i no inap larim yumi i go fri. Nogat tru.

Aisaia 65.6 i tok, *“Mi Bikpela mi raitim pinis olgeta sin bilong yupela ol manmeri nogut long buk bilong mi na mi no inap larim yupela. Nogat. Bai mi mekim save tru long yupela na bekim stret asua bilong olgeta sin bilong yupela.”*

Olsem na tingim, wanem yumi planim em tasol bai yumi kamautim (Galesia 6.7)

Yumi mas tingim gut long taim yumi stap laip long dispela graun. God i no inap kotim yumi sapos laip bilong yumi nau yumi stap i givim glori long em. Bai yumi amamas wantaim em long gutpela ples heven. Laip nau yumi stap bai skelim yumi long kisim bikpela pen long ples paia o amamas long heven. Olsem na laip bilong yumi mas givim gutpela smel long papa bilong gaden.

John Kaile Philip  
EBC South Simbu (Omdara)

# Kwesten taim!

Ritim ol kwesten na painim ol ansa insait long leta bokis na makim.

1. Lapun mama i mekim wanem long olgeta mani bilong em?
2. Taim mama i dai, husat i kisim olgeta mani bilong em?
3. Yumi gat husat inap long helpim yumi?
4. Wanem samting i no stap na ples rat i stap gut tru?
5. Gut moa yumi gat hamas samting?
6. Taun rat i gat planti kaikai na amamas raun tasol taim trep i holim em, wanem i kamap?



J L P J I S A H E R A I  
 T I I S O M P A A E A S  
 H K S L Q A E I R D P N  
 E L C A A R N T S N D G  
 L I I W S I K I O S Z A  
 P K Y I S F A M I L I U  
 I A M B F A X N T E D T  
 M R O A U R K G **R A T** M  
 S I Z V N I S A E I M E  
 A M I Q R W A S P M U T  
 Y O P I K I N I N I B Q



*Tasol ol man i laikim tumas long kisim planti mani samting, ol traim bai i kamap na holimpas ol olsem umben i holimpas wanpela abus.*  
*1Timoti 6.9a*



Gutpela Wasman Tim i laik tok tenkyu long brata John Kaile, EBC Omdara, South Simbu Seket i bin raitim stori i kam. Tupela stori i kam long buk, "More Little Visits With God" Translated by Guwa team



Published and printed by:  
 Publications Department  
 Evangelical Brotherhood Church (Inc.)  
 P.O. Box 996, Lae 411, Papua New Guinea

No 3/2018